

Maxci Daphek

□ Banh Singhhaij / 潘星海



Song vunz caez muenghyawj gvaq dangqnaj mbanj aen ranz bakdou miz go'nganx hozngeng haenx, youh ngaemgyaeuj danqheiq. Geijcib bi seizgan baez yaepda couh gvaqbae, siengi seizhaenx baenz bang lwgsau lwgmbauq cingsaenz goekgoek, seiz-neix mizmbangj bae gonq lo, gyoengq lij lix cix boux dem boux byoem hau hwet goz, caeuq go'nganx hozngeng haenx doxdoengz. Dah lwgsau cij-daujyenz youq Namzningz guh dayoz lauxsae, mbouj you gwn mbouj you daenj, hojsik baenz ndang bingh faj dou mbouj ndaej ok; Saujing ndangdaej vanzlij ndaej, hoeng ndawranz miz vunzbingh lij aeu goq, daj haet daengz haemh cungj dwg-rengz; canhmouzcangj gag ndaek vunz dog, cungj mbouj nyienh bae ginglaujyen, sij mbouj ndaej aen ranzcoj lajmbanj; Huz swlhing lwglan gig lai, gyoengqlwg cungj haeuj singz guhhong, geij boux lan vanzlij dwg de

dauj ganq.....

Song boux de cingq gangjgoj, ndaw mbanj cienz dauj le gij sing hemq Saujing. Songde ngiengxgyaeuj yawj bae, raen Saujing ndwn youq laj go'nganx hozngeng haenx vad fwngz. aiq ok saeh lo, songde couh vaiq buet gvaqbae. Haeuj dou yawj raen gyanghongh baet ndaej seuqsatsat, gij buhvaq ngamq saeg haenx cix venj youq gwnz faexsaul lo, caenh lumj geijcib vengq geiz nyig rumz mbinyagyag. Song boux de gaen Saujing haeuj fungh rug bae, cijdaujyenz byomvavap buenq ing buenq naengh youq gwnz eijfaexcuk, da sawsoengsoeng yawj Huz swlhing caeuq canhmouzcangj. Saujing yinx haeuj nab cienz gwnz daiz henz ndang cijdaujyenz bae, naeuz cijdaujyenz yaek hawj song fanh maenz ngaenz neix hawj de, de doi mbouj aeu.

Saujing naeuz de guh moix gienh saeh cungj geiq ndaej cingcing

cujcuj, hab aeu geijlai cienzhong couh aeu geijlai. Hoeng, cijdaujyenz baenzbaenz cungj yaek hawj de. De couh heuh Huz swlhing caeuq canhmouzcangj dauj, geij boux vunz youq itheij gangj cingcuj, gij cienz neix de faen he hix mbouj doengh, deq dah lwgsau cijdaujyenz ma le ndei gyauhdai. Dah lwgsau cijdaujyenz baeznaengz ma cungj riuj daeh hung daeh iq doxgaiq dauq, hix yaek hawj de cienz.

Huz swlhing yawj laeng canhmouzcangj bae, mbouj rox yaek baenzlawz guh. Canhmouzcangj baez naemjnaemj le, sing daemq cam cijdaujyenz: "Beixnuengx, gij cienz neix mwngz nyienh hawj Saujing dwg lwi?"

Cijdaujyenz baenz buenq ngoenz cehda cij yaepgveb. De yawjyawj Saujing, cij doiq canhmouzcangj ngaekngaek gyaeuj.

Canhmouzcangj dawz nab cienz de hwnjdaeuj, oet haeuj ndaw fwngz Saujing bae: "Neix dwg cijdaujyenz hawj mwngz, mwngz couh aeu ba!"

Saujing dawz gij cienz dauq cuengq dauqbae: "Mbouj ndaej yienghneix guh....."

Canhmouzcangj youh caiq dawz gij cienz oet haeuj ndaw fwngz Saujing bae: "Neix dangq cijdaujyenz sien cei cienzhong hawj mwngz gonq, gou caeuq Huz swlhing hawj mwngz guh cingq....."

Mbatneix cijdaujyenz lumjnaeuz dingq ndaej gig cingcuj, vaiqvaiq doiq Saujing ngaekgyaeuj. Cijdaujyenz ngeixngeix le, yawj laeng canhmouzcangj caeuq Huz swlhing bae, bak doenghvebveb, mbouj rox yaek gangj maz. Canhmouzcangj naeuz:

"Cijdaujyenz, gaej simgip, mwngz menhmenh gangj. Dou deq mwngz!"

Gij sing conghbak cijdaujyenz lumj fatwij ne, gangj mbouj ok vah lo. Canhmouzcangj caeuq Huz swlhing moengzwetwet yawj Saujing bae. Saujing naeuz: "Cijdaujyenz siengi gaen dou bae haw....."

"Baenzlawz seizneix cij gangj ne?" Huz swlhing naeuz.

"Neix dou lij deq maz dem?" Canhmouzcangj naeuz.

Huz swlhing aemq dawz cijdaujyenz couh byaij ok bakdou, canhmouzcangj caeuq Saujing couh ram aen eijfaexcuk gaen laeng okdaeuj.

Mwhneix, miz geij boux vunzlaux caeuq lwgnyez ndwn youq henz aen maxci, siengi deq naengh aen maxci bae haw. Daj gyoengq hauxseng cungj haeuj singz bae guhhong le, ndaw mbanj caenh miz bouxlaux lwgnyez youq ranz ndwi lo, banci gig noix hai gvaqdaeuj, bouxlaux daiq lwgnyez nanz byaij ndaej gyae, baenzneix gyoengqde maij deq aen maxci Huz swlhing bae haw.

Canhmouzcangj caeuq Saujing dawz aen eijfaexcuk cuengq hwnj gwnz maxci. Huz swlhing dawz cijdaujyenz umj naengh gwnz eij bae, Saujing naengh youq henz de rez. Raen gwnz ci naengh rim le, Huz swlhing mbouj naengh lo, yien max byaij dwk.

Canhmouzcangj youh boq aen dig de lo. Mbatneix de boq gij go cungj dwg bonjfaenh gag bien, gig miz gij feihdauh fwen bonjdeih. Gij sing dig de caenh lumj gij rumz ci mbawfaex, riengz gij sing daez max, youq gij roen vutvut ngutngut gwnz bya goksad rwenzraeuh..... (sat)

Sawqmwh, Aulungzgeiz suk dauq gij fwngz de, iet hwet, gou lau dwk doiqdauq yamq ndeu, baihlaeng "aiyo" sing he.

Mbouj rox dwg byawz deng gou caij mbat din ndeu, gou ndwn maenh le yawj fwngzgvas Aulungzgeiz, lij ndei, mbouj deng duzngwz haeb, hix mbouj lae lwed, sim gou cij onj roengzdaeuj.

Seizneix, Aulungzgeiz engq yiemzsuk lo, de lumj lumz le dou geij boux lwgnyez neix, yaengx gen'gvaz, ngaemgyaeuj roengzdaeuj aeu fwngzswix geij ok saivaq de, duet geu vaq ndaem raez gavaq lij binj haenx roengzdaeuj, cuengq youq gwnznamh, seizneix ndang de cij lw diuz vaqndaw saekmong.

De guh doenghneix gig mbouj cingqciengz, yied dauj yied hawj gou roxnyinh doeksaet, nanzdauh de duet vaq yaek caeuq duz ngwz hung buekmingh?

•Sawcuenhraz Lwgnyez•

Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

Gou ngeix Ah Gunh gyoengqde itdingh hix cingq doeksaet, cijdwg byawz hix mbouj gamj oksing, cij ndaej nyaenx dwk, dinghdingh ndwn youq baihlaeng gou yawj.

Fwngz gvaz yaengx sang haenx cuengq roengzdaeuj lo, Aulungzgeiz caiq gungj hwet roengzbae, aen gyaeujhoq he gvih youq gwnz rinbanj, nyeng gyaeuj caeuq mbaq, youh iet fwngzgvas haeuj ndaw geh bae lo.

Sim gou youh deng venj hwnj-dauj lo.

Yawjraen mbaq de saenzdedded,

goj liuh ndaej daengz de dwg aeu fwngzgvas youq ndaw geh laj rinbanj damqra nyauxhoed dwk, couh lumj dou youq ndaw conghrin iq henz dah mo duzbaeu nei, caen hawj vunz yousim de ndaej hanh laeleklek.

Seiqhenz dinghrikrik, lienz gij sing Ah Guih sup mug hix mbouj ndaejnyi lo, gou laihnaeuz gyoengqde cungj buetdeuz lo, riengjret cienq gyaeuj baez myaeg, 8 aen lwgda byaengq ndaej lumj bouxsien dawz dou ndaw miuh nei youh hung youh luenz, boux ndeu hix mbouj

noix.

"Hei!"

Sawqmwh, gij sing lumj byajbag nei hawj gou doeksaet yat, ngamq simdingh roengzdaeuj, cij raen Aulungzgeiz ndwn hwnjdaeuj, gen'gvaz roengzrengz dad coh baihlaeng, diuz faexgyaengh mong hau mbin coh baih dou. Dou baez foengx, yamq din cienq ndang couh buetdeuz.

"Duz neix caen dwg huq ndei!"

Aulungzgeiz youh hemq sing hung he, hat ndaej gij yamq gou menh roengzdaeuj, gou doq buet doq baenq dauqlaeng yawj, raen de lumj fatbag nei, ndwn youq cungqgyang dieghoengq, vangh diuz faexgyaengh he, gij yiengh neix beij haxbaenh Ah Gunh dang "Lij Bu" seiz vad faglem lij nyinhcaen haenqrengz.

"Gyoengqsou gaej buetdeuz ha! Daeuj bangfwngz ya!"

(caengz sat)